

時

病

論

時病論卷之八目錄

冬傷於寒大意

傷寒

中寒

冒寒

冬溫

擬用諸法

甘熱祛寒法

餘法散見各卷

備用成方

麻黃湯

葛根湯

時病論

卷之八

目錄

小柴胡湯

理中湯

真武湯

四逆湯

千金陽旦湯

千金陰旦湯

臨證治案

傷寒調治失法變證

傷寒吐衄

陽體中寒仍用熱劑而愈

冬溫肺胃合病

冬溫新感適值經行

冬溫傷陰將欲成損

附論

治時病常變須會通論

五運六氣論

溫瘟不同論

傷寒書統治六氣論

關俗醫混稱傷寒論

關時俗齷齪斑證論

夾證兼證論

成方須損益論

胎前產後慎藥論

治輕證宜細心重病

宜大膽論

醫家嫉妬害人論 醫毋自欺論

古今醫書宜參考論

少逸小影

題詞

跋

時病論卷之八

安州劉賓臣先生鑒定

三衢雷 豐少逸手著

受業

新安程曦錦雲
盈川江誠抱一 叅訂

○冬傷於寒大意

經曰冬傷於寒、謂交立冬之後、寒氣傷人、其能固密者、何傷之有、一有不謹、則寒遂傷於寒水之經、卽病寒熱無汗、脈來浮緊、名曰傷寒是也、一交春

時病論

卷之八 冬傷於寒大意

令、便不可以傷寒名之、然冬令受寒、有淺深之別
焉、深者爲中、淺者爲冒、蓋中寒者、寒邪直中於三
陰之裏、故有吐瀉腹痛、急宜熱劑祛寒、冒寒者、寒
邪冒於軀殼之外、則有寒熱身疼、不難一汗而愈、
傷寒中寒冒寒、略述其概、猶有冬溫之證、不可不
詳、冬溫者、冬應寒而反溫、非其時而有其氣、人感
之而卽病者是也、宜用辛涼之法、慎勿誤用麻桂
青龍、若誤用之、必變證百出矣、此四者、乃冬時卽

病之新感也。倘受微寒微溫之氣，當時未發，必待來春而發者，便是伏氣之病，須別諸溫而治之。或問曰：曾見東垣之書，已有冬傷於寒，春必病溫等論。先生拾前人之唾餘，竟以爲獨開生面之創。欺人乎？抑亦自欺之甚也？答曰：子言過矣。豐亦見此事難知之內，有論四篇，所云都是五行生尅有餘不足，所勝所不勝之理，其義難明，誠難知之書也。豐今分論八篇，以爲時證提綱，其理透徹，閱者

易知、明出冬傷於寒之新感、所見何證、冬傷於寒、春必病溫之伏氣、所見何證、一一詳明、瞭如指掌、與東垣之論、意思懸殊、何嘗拾其唾餘、以爲己出耶、此猶應試、共一題目、而文字實不雷同、奚敢欺人、復自欺耳、然乎否乎、

傷寒

傷寒者、由冬令之寒邪、傷於寒水之經也、考諸賢之書、皆謂霜降之後、春分以前、有感觸者、是爲傷寒、據

六氣而推之、似乎不然、蓋霜降之後、猶是燥金主氣、有感之者、是涼氣也、如或天氣大寒、卽金匱所謂未至而至也、春分以前、正是風木司權、有感之者、是風邪也、如或天氣大寒、卽金匱所謂至而不去也、若此則界限分矣、其實傷寒之病、確在乎立冬之後、寒水主政之時、一交春令、風木主政、便不可以傷寒名之、卽有寒熱爲病、與傷寒相似者、便是先賢所謂春應溫而反寒、寒疫之病也、夫傷寒之爲病、頭疼身痛、寒

熱無汗、脈來浮緊者、宜用辛散太陽法去前胡紅棗、加紫蘇葱白治之、如體實邪盛者、仲聖麻黃湯亦可用之、若果有汗、脈浮而緩、便是傷風之病、倘悞用之、變證蜂起矣、此略述寒邪初傷太陽寒水之經之證也、其傳經兩感、合病併病、及誤治變證壞證、仲景書中細詳、可毋重贅、豐嘗謂凡學時病者、必須叅讀仲景傷寒論、庶可融會貫通、否則不可以言醫也、

中寒

中寒者、交一陽之後、時令過於嚴寒、突受寒淫殺厲之氣、卒然腹痛、面青吐瀉、四肢逆冷、手足攣蹠、或昏閉身涼、或微熱不渴等證、丹溪曰、倉卒中寒、病發而暴、難分經絡、溫補自解、斯說似乎減裂、其實有三陰之別焉、蓋太陰中寒、則脘中作痛、少陰則臍腹作痛、厥陰則少腹作痛、見證旣分、更當審其脈象、如沉緩中太陰、沉細中少陰、沉遲中厥陰、若此別之、庶幾導窾、如果脈微欲絕、昏不知人、問之不能答、似此難分

時病論

卷之八

中寒

四

經絡始可遵丹溪用溫補之劑、急擬挽正回陽法治之、三陰中寒、皆以甘熱祛寒法治之、若寒中太陰、以乾薑爲君、少陰以附子爲君、厥陰以吳萸爲君、吐甚加藿香豆蔻、瀉甚加蒼朮木香、筋攣者、佐以木瓜橘絡、呃逆者、佐以柿蒂丁香、臨證之間、切宜細辨而治、庶無貽誤、

冒寒

冒寒之病、偶因外冒寒邪、較傷寒則輕、比中寒甚緩、

蓋傷寒傷乎六經、中寒直中乎裏、惟冒寒之病、乃寒氣罩冒於軀殼之外、而未傳經入裏也、是以遍體痠疼、頭亦微痛、畏寒發熱而乏汗、脈象舉之而有餘、宜辛溫解表法治之、服藥之後、務宜謹避風寒、覆被而臥、俾其微微汗出而解、否則傳經入裏、當審何經而分治之、倘或伏而不發、來年必發爲春溫風溫等病、不可以不知也、

冬溫

昔賢謂冬應寒而反溫、非其時而有其氣、人感之而
卽病者、名曰冬溫是也、其勞力辛苦之人、動作汗出、
溫氣乘襲、多在於表、其冬不藏精之人、腎經不足、溫
氣乘襲、多在於裏、冬溫雖發於冬時、然用藥之法、與
傷寒迥別、蓋溫則氣泄、寒則氣斂、二氣本屬相反、誤
用辛溫、變證疊出矣、其證頭痛有汗、咳嗽口渴、不惡
寒而惡熱、或面浮、或咽痛、或胸疼、陽脈浮滑有力者、
乃溫邪竄入肺經也、宜用辛涼解表法、加連翹象貝

治之。口渴甚者，溫邪入胃腑也，再加蘆根花粉治之。如或下利，陰脈不浮而滑，溫邪已陷於裏也，宜以清涼透邪法，加葛根黃芩治之。倘熱勢轉劇，神氣昏憤，譫語錯亂，舌苔轉黑者，不易治也，勉以祛熱宣竅法治之。紫雪丹亦可用之。種種變證，不能盡述，須仿諸溫門中之法可也。

或問冬溫發熱而不惡寒，倘惡寒者，爲何病也？答曰：冬溫惡寒，偶亦有之，良由先感溫氣，卽被嚴寒所侵。

寒在外而溫在裏、宜用辛溫解表法、先去寒邪、繼用涼解裏熱法而清溫氣、又問曰、傷寒冒寒皆惡寒、何以別之、曰、傷寒冒寒初起無口渴、以此別之、曰、溫邪當發爲冬溫、倘其微者、伏而不發、爲何病也、曰、伏而不發、來春必變爲溫毒也、凡治時病者、新邪伏氣、切要分明、庶不至千里毫釐之失、

又問先生之書、專爲六氣而設、風寒暑溼燥皆已詳明、何獨火證不詳、恐爲不全之書、而火證可補述否、

答曰、子不知君火秉權之候、有溫病溫毒也、相火主
政之時、有熱病暑病也、君相司令而病者、非火證而
何、何不全之有哉、況火爲陽邪、其證最著、如脈數有
力、舌苔黃燥、或目赤、或口渴、或喉痛、或溺紅、皆火證
也、法當清涼治之、其餘五志之火、龍雷之火、悉屬內
傷、茲不論之、

○擬用諸法

辛散太陽法

見卷五第十九頁

挽正回陽法

見卷四第十九頁

甘熱祛寒法

治寒邪直中三陰之證

甘草

二錢

淡乾薑

一錢

淡附片

一錢

淡吳萸

一錢

用開水略煎冷服

此卽仲景四逆湯也、擬加吳萸之大熱祛厥陰之寒邪、以之治寒中三陰、最爲中的、認庵原解曰、寒

注於內、治以甘熱、故以薑附大熱之劑、伸發陽氣、
表散寒邪、甘草亦散寒補中之品、又以緩薑附之
上僭也、必冷服者、寒盛於中、熱飲則格拒不納、經
所謂熱因寒用、又曰治寒以熱、涼而行之是也、

辛涼解表法

見卷一第十四頁

清涼透邪法

見卷一第十五頁

祛熱宣竅法

見卷一第十三頁

辛溫解表法

見卷一第十一頁

涼解裏熱法

見卷一第十二頁

○備用成方

麻黃湯

治傷寒太陽病、惡寒發熱、頭痛項強、無汗而喘、脈浮而緊者、

麻黃

桂枝

杏仁

甘草

水煎溫服、覆取微汗、

葛根湯

治傷寒太陽未罷、又傳陽明、脈浮長、緣緣面赤、頭
痛連額、發熱惡寒而無汗、目痛鼻乾不得眠等證、

葛根

麻黃

桂枝

白芍

甘草

生薑

大棗

水煎溫服、取微似汗

小柴胡湯

治傷寒少陽病、往來寒熱、口苦耳聾、脇滿脈弦、目
眩、不欲食、心煩喜嘔、及婦人傷寒、熱入血室等證、

柴胡

人參

製夏

黃芩

甘草

生薑

大棗

水煎溫服

理中湯

治傷寒太陰病、自利不渴、寒多而嘔、腹痛、便溏、脈沉無力、或厥冷拘急、或結胸吐衄、及感寒霍亂。

人參

白朮

炮薑

炙草

本方加附子名附子理中湯

真武湯

治少陰傷寒腹痛、小便不利、四肢沉重疼痛、自下利者、此爲有水氣、或咳或嘔、或小便利、及太陽病發汗、汗出不解、仍發熱、心悸頭眩、筋惕肉瞤、振振欲擗地、氣虛惡寒、

附子

白芍

白朮

茯苓

加生薑煎服

四逆湯

治三陰傷寒、身痛、腹痛、下利清穀、惡寒不渴、四肢厥冷、或反不惡寒、面赤煩躁、裏寒外熱、或乾嘔、或咽痛、脈沉微細欲絕、

附子

乾薑

炙甘草

水煎冷服

豐按傷寒之方、計有一百一十三道、長沙書中已全備矣、凡學醫者、必須熟玩、今錄此六方、不過明六經傷寒之用、其寒邪化熱、及傳變諸方、不能盡

錄當閱傷寒之書自明著矣

平金陽旦湯

治冬溫脈浮發熱項強頭痛

桂枝

白芍

黃芩

甘草

加薑棗煎服

平金陰旦湯

治冬溫內寒外熱肢節疼痛中挾寒食

卽陽旦湯加乾薑

豐按陽旦湯主治先感冬溫又被風寒所遏之病，陰旦湯主治體質本寒忽受冬溫之病，如咳嗽口渴甚者，葛桂究難浪用，凡一切溫熱之病，最忌辛溫之藥，偶或用之，非本質屬寒，卽外加寒氣，倘拘於陽旦陰旦爲冬溫一定之方，不亦惑乎。

臨證治案

傷寒調治失法變證

須江毛某患傷寒之病，壯熱不退，計半月來，前醫

當汗不汗、當下不下、調治失法、變爲神昏譫語、循衣摸牀、舌苔黃燥、脈來沉實、此傷寒誤治之變證也、速宜攻下之劑、蕩熱保津、倘以硝黃爲砒鴆者、則不可救、卽以大承氣湯加生地石膏、煎一大劑、午後服頭煎、未見動靜、薄暮服次煎、至四更時分、得鞭屎數十枚、譫語漸少、手足漸定、肌膚微汗、身熱退清、神識亦稍省矣、次日復邀豐診、脈形仍實、不柔、舌苔尙少津液、此餘熱未淨也、當守原方、再

服一帖、其兄恐藥力太過、豐曰、必要脈象轉柔、舌苔轉潤、裏熱始盡、否則餘邪復聚、遂難治矣、復將原方煎服、服下又得硬屎數枚、其兄急來問曰、次煎可服否、豐曰、往診再議、幸得脈轉平緩、舌苔亦見有津、改用仲景炙甘草湯、除去桂枝、薑棗、加入柏子茯神、連服數煎、得全瘥耳、

程曦曰、凡治病必以脈舌爲主、若遇神昏譫語、循衣摸牀之證、倘其脈見軟弱者、舌淡苔微者、皆不

可攻也、必須脈來沉實、或大有力、舌苔黃燥、或起芒刺、方可攻之、以上見證、有虛有實、或補或攻、當細別之、又不可執於承氣一法也、

傷寒吐衄

新定章某、患傷寒六七日來、身熱如焚、前醫初用辛散、繼用苦寒、熱仍不退、更加嘔逆吐衄、四末微冷、急來求治於豐、診其脈、細小而沉、舌苔白薄、豐曰、此陰陽錯雜之證、將成衄厥之徵、思先哲云、雜

病吐虻責於熱、傷寒吐虻責於寒、卽用椒薑以溫其中、桂枝以透其表、參附以扶其正、連梅以安其虻、更佐豆蔻和中止嘔也、令服一劑、嘔逆已定、四末轉溫、惟軀熱未清、姑守舊方、除去薑附、加入芩柴、一服中機、後議數方並效、調理半月得安、陽體中寒、仍用熱劑而愈、

瀝水姜某、稟體屬陽、生平畏嘗熱藥、一日腹中作痛、比豐診之、兩手之脈皆沉遲、舌根苔白、豐曰、此

寒氣中於太陰、理當熱藥祛寒、曰、素不受熱藥、奈
何、曰、旣不任受、姑以溫中化氣爲先、中機最妙、否
則再商、卽以豆蔻砂仁、吳萸烏藥、木香、厚朴、蘇梗、
煨薑服之、未驗、復診其脈、益見沉遲、四肢逆冷、更
甚、豐曰、寒邪深入、誠恐痛厥、非薑附不能效也、雖
然陽臟亦當先理其標、卽用甘熱祛寒法、加肉桂、
白芍治之、遂中病機、腹癰頓減、脈形漸起、手足回
溫、改用調中、始得安適、可見有病有藥、毋拘稟體

陰陽但陽體中寒辛熱不宜過劑陰質患熱寒涼不可過投遵內經衰其大半而止最妥

冬溫肺胃合病

城北方某木火體質偶患冬溫約有半月矣治療乏效轉請豐醫按之脈形洪數兩寸極大苔黃舌絳口渴喜涼喘咳頻頻甚則欲嘔痰內時有鮮紅思內經有肺咳之狀咳甚唾血胃咳之狀咳甚欲嘔之文此顯係肺胃受邪明若觀火矣見前方都

是滋陰滋血之劑、宜乎冰炭耳、豐用清宜金臟法、去桔梗、加花粉、鮮斛治之、疊進五劑、諸證漸平、調治旬餘遂愈、

冬溫新感適值經行、

徽歙鮑某之女、閨中待字、經水素不調勻、一月兩期、難免血海無熱、一日忽患冬溫、發熱咳嗽、胸閉喉疼、天癸又至、斯時用芩連梔子以卻其溫、實有碍乎經事、倘用歸芎艾葉以調其經、實有碍乎溫

氣細推其證、口不作渴、其邪在肺而不在胃、腹不作痛、其經因熱而不因寒、古人雖謂室女莫重於調經、然今溫邪告急、不得不先治標、其實清肺之方、治上而不妨下、遂用牛旁象貝桔梗射干桑葉薄荷襲皮叭杏、青果爲引、連服三劑、軀熱退清、咳嗽亦衰大半、但腹內轉疼、天癸滴瀝靡盡、仍照原方、益以香附澤蘭、又服數煎、諸恙平復矣、

冬溫傷陰將欲成損

豐於冬至赴龍掃墓經過安仁街適有楊某患冬
溫未愈有相識者謂豐知醫楊卽懇診查其所服
之方非辛溫散邪卽苦寒降火皆未得法其脈細
小滑數咳嗽痰紅發熱顙赤此溫熱傷陰之證也
當用甘涼養陰辛涼透熱虛象已著急急隄防若
再蔓延必不可挽卽用清金甯絡法去枇杷葉麥
冬細地改爲大地再加丹皮地骨川貝蟬衣治之
服至五貼熱退紅止矣豐返復過其處見病者面

有喜色、謂先生真神藥也、病勢減半、惟賸咳嗽數聲、曰、晡顴赤而已、診之脈亦稍和、此欲愈之象也、姑照原方去旱蓮蟬退、加龜版鱉甲、令其多服、可
以免虛、歲暮以茶食來謝、始知其恙全可、

附論

○治時病常變須會通論

拙著已告竣矣、首先論證、其次立法、其次成方、又其次治案、醫者能於此熟玩、自然融會貫通、弗執定某證之常、必施某法、某證之變、必施某法、臨證時隨機活法可也、姑先論其常而通其用、如初起因於風者、宜以解肌散表法、因於寒者、宜以辛溫解表法、因於暑者、宜以清涼滌暑法、因於溼者、宜以增損胃苓法、

因於燥者、宜以苦溫平燥法、因於火者、宜以清涼透
邪法、此皆言初患六氣之常證、通用之定法也、至於
反常之變證、不定之活法、則又不可不知、如春溫條
中、有舌絳齒燥、譫語神昏、手足癱瘓、昏瞶不語之變
溼溫條中、有或笑或瘞、撮空理線、舌苔黃刺、或轉焦
黑之變、然而亦非一定之變也、須知春溫亦有溼溫
之變證、溼溫亦有春溫之變證、論中不能印定、須活
法而通治之、此又不特春溫溼溫可以會通、而暑溫

冬溫以及諸病、皆有等證之變、悉可以通治之、又如
諸病、見有舌絳齒燥、熱傷於陰者、清熱保津法、可通
用之、譫語神昏、熱亂神明者、祛熱宣竅法、可通用之、
手足癱瘓、熱極生風者、清離定巽法、可通用之、昏瞶
不語、痰襲心包者、宣竅導痰法、可通用之、及至發笑
之證、皆由邪襲於心、發瘕之證、皆係風乘虛入、或至
撮空理線、循衣摸床等證、皆當審其虛實、通其活法、
則不但治時病可以融會、卽治雜病亦有貫通之妙

時病論

卷之八

耳

○五運六氣論

治時令之病、宜乎先究運氣、經曰、不知年之所加、氣之盛衰、不可以爲工也、戴人云、不讀五運六氣、檢遍方書何濟、由是觀之、治時病者、可不知運氣乎、近世之醫、皆謂五運六氣與歲多有不應、置之弗習、是未達夫天地之常變也、常者如君相司令則當熱寒水主政則當寒、變者當熱反寒、當寒反熱之類是也、試

以其常而言之、五運者、木火土金水也、一運主七十
二日有奇、六氣者、風君相溼燥寒也、一氣司六十日
有奇、故五運六氣合行、而終一歲、蓋土運主氣、歲歲
皆然、客運客氣、年年更換、每年從大寒日、初交木運、
二爲火運、三爲土運、四爲金運、終爲水運、此主運也、
經曰、甲己之歲、土運統之、乙庚之歲、金運統之、丙辛
之歲、水運統之、丁壬之歲、木運統之、戊癸之歲、火運
統之、如甲己之年、甲己化土、土爲初運、金爲二運、水

爲三運、木爲四運、火爲五運、此客運也、主氣亦從大
寒日交、厥陰風木爲初氣、少陰君火爲二氣、少陽相
火爲三氣、太陰溼土爲四氣、陽明燥金爲五氣、太陽
寒水爲終氣、此主氣也、客氣每歲循環、依年推算、如
子午之年、初爲寒水、二爲風木、三爲君火、四爲溼土、
五爲相火、終爲燥金、又如丑未初爲風木、寅申初爲
君火、卯酉初爲溼土、辰戌初爲相火、己亥初爲燥金、
此客氣也、每年三氣爲司天、終氣爲在泉、如子午之

年三氣是君火、乃君火司天、主熱淫所勝、終氣是燥金、乃燥金在泉、主燥淫於內、其餘可類推矣、倘遇壬戌甲庚丙之年、皆曰太過、木曰發生、火曰赫曦、土曰敦阜、金曰堅成、水曰流衍、丁癸己乙辛之年、皆曰不及、木曰委和、火曰伏明、土曰卑監、金曰從革、水曰涸流、若太過被剋、不及得助、皆曰平運、木曰敷和、火曰升明、土曰備化、金曰審平、水曰靜順、此述五運六氣之主客、司天在泉太過不及之大概、在學者先宜熟

此有定之常、然後審其無定之變可也、倘欲深求底蘊、再考內經、慎毋惑於飛疇運氣不足憑之說耳、

○溫瘟不同論

溫者、溫熱也、瘟者、瘟疫也、其音同而其病實屬不同、又可瘟疫論中、謂後人省了、加疔爲瘟、瘟卽溫也、鞠通溫病條中、統風溫溫熱溫疫溫毒冬溫爲一例、兩家皆以溫瘟爲一病、殊不知溫熱本四時之常氣、瘟疫乃天地之厲氣、豈可同年而語哉、夫四時有溫熱、

非瘟疫之可比。如春令之春溫、風溫、夏令之溫病、熱病、長夏之暑溫、夏末秋初之溼溫、冬令之冬溫。以上諸溫，是書皆已備述。可弗重贅。而鞠通先生之書，其實爲治諸溫病而設也。至於瘟疫之病，自唐宋以來，皆未詳細辨論。迨至明末年間，正值凶荒交迫，處處瘟疫，慘不堪言。吳又可先生所以著瘟疫論一書，所謂邪從口鼻而入，則其所客，內不在臟腑，外不在經絡，舍於伏膺之內，去表不遠，附近於胃，乃表裏之分。

界是爲半表半裏卽鍼經所謂橫連膜原是也其初起先憎寒而後發熱日後但熱而無憎寒初得之二三日其脈不浮不沉而數頭痛身疼晝夜發熱日晡益甚者宜達原飲治之咸豐八載至同治紀元粵匪竄擾吾徼大兵之後繼以凶年沿門合境盡患瘟疫其時豐父子診治用力皆宗又可之法也更有頭面頸項頰腮並腫者爲大頭瘟發塊如癰遍身流走者爲疔瘡瘟胸高脇起嘔汁如血者爲瓜瓢瘟喉痛頸

大寒熱便秘者爲蝦蟆瘟一名捻頸瘟兩腮腫脹憎寒惡

熱者爲鷓鴣瘟遍身紫塊發出微瘡者爲楊梅瘟小

兒邪鬱皮膚結成大小青紫斑點者爲葡萄瘟此皆

瘟疫之證與溫病因時之證之藥相去徑庭決不能

溫瘟混同而論也因憶又可著書正崇禎離亂之凶

年鞠通立論際乾嘉昇平之盛世一爲瘟疫一爲溫

熱時不同而病亦異由是觀之溫病之書不能治瘟

疫瘟疫之書不能治溫病故凡春溫風溫溫病暑溫

溼溫冬溫字必從疒。瘟疫大頭疔瘡瓜瓢蝦蟆鷓鴣
楊梅葡萄等癰字又從疒。溫瘟疫兩字判然不同。而況
病乎。知我者幸弗以豐言爲河漢也。

○傷寒書統治六氣論

漢長沙著傷寒論以治風寒暑溼燥火六氣之邪。非
僅爲寒邪而設。然則其書名傷寒何也。蓋緣十二經
脈惟足太陽在表爲寒水之經。凡六淫之邪爲病者
皆必先傷於寒水之經。故曰傷寒。今人都以寒水之

寒字誤爲寒熱之寒。若此則傷寒之書專治寒邪而風暑燥溼火了不干涉矣。殊不思長沙首列桂枝湯以治風。明明指人統治六氣而非僅治一寒邪之意。於此已露一斑。若果專治寒邪。理當列麻黃湯附子湯。四逆理中等湯爲先。而不列桂枝湯爲首也。況又有白虎湯以治暑。五苓散以治溼。炙甘草湯以治燥。大小承氣以治火。此顯明六氣統治之書。而今以爲專治寒邪。則誤甚矣。時賢又謂傷寒論六經溫熱論

時病論

卷之八

三焦此兩句書更爲印定眼目不知邪氣襲人皆由表而入於裏惟瘟疫之氣穢濁之氣乃論三焦可也以其氣從口鼻而入先擾於上次傳中下除此而外則風寒暑溼燥火無不盡從表入況李迺謂太陽行身之表外邪皆得傷之其傷寒之書能統治六氣者可無疑矣凡學治時病者必須讀仲景傷寒論參讀時賢之書考古酌今則胸中自有風寒暑溼燥火之界限若不讀仲景之本而專讀時賢之書真所謂舍

本求末矣。

關俗醫混稱傷寒論

人被寒所傷者、謂之傷寒。夫寒居六氣之一、豈可混稱乎。嘗考寒水之令、在乎小雪大雪冬至小寒之節、共主六十日有奇。蓋小雪居於十月、乃六陰盡出之際、而寒氣方盛之時。大雪冬至居十一月、小寒居十二月、正聲發栗烈之候。斯時之氣、人感觸者、盡屬傷寒之病。勿可以大寒至驚蟄之風木、春分至立夏之

時病論

卷之八

君火、小滿至小暑之相火、大暑至白露之溼土、秋分至立冬之燥金、等等之時所患者、混同一稱傷寒、然而亦有可稱者、不可不知、豐於前論中、有謂傷寒之寒字、爲寒水之經之寒、非寒熱之寒也、凡風寒暑溼燥火、無不由表而入、皆必先傷於寒水之經、六氣之邪、僉可稱爲傷寒、但有不可稱者、又不得不力辨其非、嘗聞專治傷寒家有溫病傷寒、熱病傷寒、痧證傷寒、瘡瘍傷寒等名、不知溫病熱病、皆屬伏氣、痧因沙

藏瘡因溼熱、豈可混稱爲傷寒乎、尤有夾痰傷寒、夾
食傷寒、夾氣傷寒、夾血傷寒等名、揆厥由來、痰食氣
血、是爲傷寒之兼證、又豈可混稱爲傷寒乎、仲景原
文、從未見有此證、竊疑其爲杜撰也、後見吳中戈存
橘先生傷寒補天石中、果有以上諸證之名、始知其
有自也、雖然戈氏之書、醫者不必宗之、其所當宗者、
如無己之明理、嘉言之尙論、韻伯之來蘇、路玉之大
成、誠爲醫家不可少之書、後學所宜奉爲圭臬也、至

時俗混稱傷寒之證、更爲不通、見初起嘔吐者、謂爲
齟齬傷寒、泄瀉者、爲漏底傷寒、脇痛者、爲刺脇傷寒、
寒不甚寒、熱不甚熱、綿綿難愈者、爲癰疲傷寒、卽徽
俗謂之混沌傷寒、名目極多、難以枚舉、總之小雪至
小寒而重感者、爲眞傷寒、風暑燥溼火、先傷寒水之
經者、亦可稱爲傷寒、至溫病熱病、痧症瘡瘍、決不能
混入傷寒、兼痰食氣血者、是爲傷寒之兼證、其餘種
種不通之名、皆不足論、醫者須按四時之六氣、而分

其孰爲風暑孰爲燥溼究不可籠統混爲傷寒病也

○關時俗齷齪斑證論

吾衢土俗凡患四時之感冒見有發熱嘔吐等證開口便云齷齪動手便是刮揪揪之刮之未嘗不善但其邪在肌肉者頃刻而鬆在經絡者非藥不愈最可惡者先服礬湯一碗以爲治齷齪之需殊不知齷齪卽方書所謂穢濁宜川芳香宣解之方反服酸寒收澇之藥益使穢濁之邪膠固氣分而無解病之期更

有一種俗醫以指節刮病人之身見有一條扛起者
妄言爲斑不知人感穢濁時邪氣機阻滯血脈不通
用指節刮之或粗或細必有一條見出豈可僞稱爲
斑證更爲之取出蛇斑蚤斑等等之名其謂爲蛇斑
者必令人服蜈蚣數條取蛇畏蜈蚣之義而庸夫俗
子聽之益信不知蜈蚣之性辛溫有毒直入厥陰初
患時邪之證服之極易化火更引最淺之邪而入於
深曷不觀方書所云大如錦紋者爲斑其色紅紫而

成片、或至黑色而病危、是爲胃熱之候、古人所以用
舉斑湯化斑湯之類以治之、或見病人身發紅點、遂
稱爲蚤斑、而亂投草藥、及至危險、便說斑老難醫、推
其身見紅點、卽方書所謂小如蚊咬者爲疹、是爲肺
熱之候、古人所以用升葛湯銀翹散之類以治之、俗
醫以僞溷真、豈不可歎、旣以初起之時、不爲齮齬斑
證、更禁病人勿服湯藥、每見輕病轉重、重病轉危、此
皆吾衢土俗之貽害匪淺也、要之揪刮無妨、所患者、

惟礬湯蜈蚣草藥禁藥之弊。奉勸病家。不可過信俗醫而自誤。則幸甚矣。

○夾證兼證論

人皆謂夾證與兼證難治。豐獨曰。無難也。曷爲夾證。譬如受風便是傷風。宜桂枝湯之屬。受寒便是傷寒。宜麻黃湯之屬。倘風寒兩傷者。卽爲夾證也。蓋風宜散。寒宜溫。溫散之方。宜桂麻各半湯之屬。倘或暑邪夾溼。溼宜利。暑宜清。清利之方。宜天水散之屬。倘或

燥氣夾火、火宜涼、燥宜潤、涼潤之方、宜清燥救肺湯
之屬、其餘風暑風溼風燥風火、皆係夾證、其治法皆
可仿此、至於兼證奈何、假如少壯遺精、當分夢之有
無、有者宜坎離既濟湯之類、無者金鎖固精丸之類、
此定法也、或被溼熱所觸者、便爲兼證、利溼必傷其
陰、補陰必滯其溼、思利溼而不傷陰者、如猪苓湯六
味丸之類、若溼邪甚者、又當先治其溼、溼邪一化、再
瀉其精可也、又如老年虛損、當分證之淺深、淺者宜

六君四物之類、深者宜固本大造之類、此定法也、倘被風邪所客者、便爲兼證、散風益虛其正、補正必關其邪、思散邪而不損正者、如參蘇飲、補中益氣之類、若風邪甚者、又當先散其風、風邪一解、再補其損可也、又如女子經事當行、必審其或先或後、先則爲血熱、宜丹梔四物之流、後則爲血寒、宜香砂四物之流、此爲定法、或被寒邪所觸者、卽兼證也、考諸方能散寒、且能調經、如香蘇飲之流、若過盛者、必須先散其

寒、再調其經則可矣。又如婦人產後發熱，必辨其屬虛屬實，虛則宜補益，如加味四物之流，實則宜破瘀，如生化失笑之流，此爲定法。設被暑邪所感者，卽兼證也。考諸方能清暑且治產後，如竹皮大丸之流，若過盛者，必須先清其暑，再治產後則可矣。醫者能於如此圓變，則治夾證兼證，何難之有。

成方須損益論

自南陽制方而始，厥後唐宋元明及國朝以來，成

方不可勝紀焉。能熟悉於胸，嘗見有讀千金方者，有讀醫方考者，有讀景岳新方者，有讀認菴集解者，往往宗此而不知彼，宗彼而不知此者，不待言矣。竊謂古人成方，猶刻文也；臨證，猶臨場也。卽有如題之刻文，慎勿直抄，必須師其大意，移步換形，庶幾中式。而臨證卽有對病之成方，亦當諒體之虛實，病之新久，而損益之。思成方不在多，而在損益。譬如二陳湯，卽夏苓陳草也。治一切痰飲之病，除去陳皮，乃海藏之

消暑丸、伏暑煩渴用之、此一減而主治之法、相去逕
庭矣、平胃散、卽陳蒼朴草也、治一切溼氣之病、加入
芒硝、乃女科之下胎方、死胎不下用之、此一加而主
治之法、相懸霄壤矣、此損益之法也、醫者知是理乎、
又如氣虛用四君、血虛用四物、倘氣血兩虛之候者、
二方合用名八珍湯、此深一層之病、而加深一層之
方也、利溼用五苓、清熱用三石、倘溼熱並盛之候者、
二方合用名甘露飲、此亦深一層之病、而加深一層

之方也。又如固本丸治虛勞損證、減去麥冬、生地、名曰三才、以治三焦虧證、此輕一等之病、而減爲佐之藥也。香蘇飲治四時感冒、減去香附、紫蘇、名曰二賢、以治膈中痰飲、此亦輕一等之病、而減爲君之藥也。諸如此類、不可枚舉。在醫者、必須臨證權衡、當損則損、當益則益、不可拘於某病用某方、某方治某病、得能隨機應變、則沉疴未有不起也。

○胎前產後慎藥論

胎前之病、如惡阻、胞阻、胎漏、墮胎等證是也、產後之病、如血塊、血暈等證是也、婦科書中已詳、可毋備述、而其最要述者、惟胎前產後用藥宜慎、凡治胎前之病、必須保護其胎、古人雖有有故無殞、亦無殞也、大積大聚、其可犯也、衰其大半而止之訓、奈今人膠執有故無殞之句、一遇裏積之證、恣意用攻、往往非傷其子、卽傷其母、蓋緣忽略衰其大半之文耳、竊揣胎在腹中、一旦被邪盤踞、攻其邪則胎必損、安其胎必

礙乎邪、靜而籌之、莫若攻下方中、兼以護胎爲妥、此
非違悖內經、實今人之氣體、不及古人萬一也、且不
但重病宜慎其藥、卽尋常小恙、亦要畱心、如化痰之
半夏、消食之神麴、寬脹之厚朴、清腸之槐花、涼血之
丹皮、茅根、去寒之乾薑、桂附、利溼之米仁、通滑、截瘡
之草果、常山、皆爲犯胎之品、最易誤投、醫者可不儆
懼乎、至於產後之病、嘗見醫家不分虛實、必用生化
成方、感時邪者、重投古劑、體實者、未嘗不可、虛者攻

之而裏益虛、散之而表益虛、虛虛之禍、卽旋踵矣。又有一等病人信虛、醫人信補、不分虛實、開口便說丹溪治產後之法、每每大補氣血、體虛者未嘗不可、倘外有時邪者、得補益劇、內有惡露者、得補彌留、變證疊加、不自知其用補之咎耳。要之胎前必須步步護胎、產後當分虛實而治、毫釐差謬、性命攸關、惟望同志者、凡遇胎前產後之病、用藥勿宜孟浪、慎之慎之。

○治輕證宜細心、重病宜大膽論、

時病論

卷之八

膽欲大而心欲小。此孫真人祝醫最確之語也。竊謂
治初起之輕證。必須細心。當辨其孰爲風而用疎。孰
爲寒而用溫。孰爲暑而用清。孰爲溼而用利。孰爲燥
而用潤。孰爲火而用瀉。尤當審其體之虛實。病之新
久。在女子兼詢經期。婦人兼詳胎產。如是者。則用藥
庶無差忒矣。倘粗心而不細者。大意茫茫。不分六氣
所感何氣。動手便用荆防。病家告之有痰。遂投陳夏。
有食。遂用神查。問其何病。指鹿爲馬。問其輕重。總說

無妨。往往使輕淺之病，日漸延深，是誰之過歟？聖人云：不忽於細，必謹於微，其可略乎？至若垂危之重證，必須大膽，見心包邪竄者，當宜則宜，肝風內動者，當平則平，脾虛氣陷者，當培則培，肺氣欲絕者，當補則補，腎液欲涸者，當滋則滋，更有危險之虛證，速宜用參耆之屬，實證用硝黃之屬，寒證用薑桂之屬，熱證用犀羚之屬，勿宜遲緩，亟亟煎嘗，如是者，則沉痾庶有挽救矣。倘膽小而不大者，當用而不敢用，或用而

不敢重、重用恐其增變、變證恐其歸怨、往往姑息養
奸、坐觀其敗、是誰之過歟、古人云、不入虎穴、焉得虎
子、其可懼乎、若果輕淺之證、過於膽大立方、不啻小
題大做、沉重之證、過於小心慎藥、無異杯水車薪、其
實膽大而不細心、所謂暴虎馮河者、誤事也、細心而
不大膽、所謂狐疑鼠首者、亦誤事也、誠哉孫氏之言、
足爲千古之醫訓矣、

○醫家嫉妒害人論

嘗觀世之同行，每多嫉妒。行行猶可，惟醫道中最爲甚焉。夫醫以蘇人之困，拯人之危，性命爲重，功利爲輕，而可稍存嫉妒哉？奈何今之醫者，氣量狹窄，道不求精，見有一神其技者，則妒之，妒心一起，害不勝言。或謠言百出，或背地破道，或前用涼藥，不分寒熱而改熱，前用熱藥，不別寒熱而改涼，不顧他人之性命，惟逞自己之私心，總欲使有道者道晦，道行者不行，以遂其嫉妒之意。每見病家患溫熱之病，醫者投以

辛涼甘涼本不齟齬、但服一二劑、未獲深中、病者見
熱渴不已、心中疑懼、又換一醫、且明告曾延醫治、而
所換之醫、遂不察其病因、見前有寒涼之藥、便咎前
醫用寒涼之害、不辨證之寒熱、脈之遲數、舌苔黃白、
小水清澀、竟亂投溫熱之方、不知溫熱之病、得溫熱
之藥、無異火上添油、立刻津乾液涸、而變生俄頃、倘
前用熱藥、以治其寒、亦咎其用熱藥之害、總不辨其
爲寒爲熱、亂用寒涼之方、不知寒證服寒涼、猶如雪

上加霜、立使陽亡氣脫、而變在須臾、直至垂危、尙怨前醫之誤、可勝悼哉、然亦有明駁前醫、暗師前法、而獲效者、竟爾居功、索人酬謝、若此重財輕命、只恐天理難容、奉勸醫者、毋懷妒忌、大發婆心、則幸甚矣、

○醫毋自欺論

醫者依也、人之所依賴也、醫毋自欺、斯病家有依賴焉、夫醫之爲道、先詳四診、論治當精、望色聆音、辨其臟腑之病、審證切脈、別其虛實而醫、若此可謂毋欺

也。至臨證之時，細分部候，知其何爲浮主表病，沉主裏病，遲主寒病，數主熱病，何爲人迎脈大之外感，氣口脈大之內傷，更須望其青赤黃白黑五色之所彰，聞其角徵宮商羽五音之所發，問其臊焦香腥腐五氣之所喜，以明其肝心脾肺腎五臟之病因，而用其酸苦甘辛鹹五味之藥餌，能如是者，何欺之有。惟其一種庸流，欺人妄誕，見病人有寒熱者，一疑其爲外感，欺病家不知診法也，不別其脈之虛實，而浪投發

散之劑、又見病人有咳嗽者、一疑其爲虛損、欺病家
不諳醫理、也不辨其體之強弱、而恣用補益之方、至
於五色五音五氣、一概不知審察、焉能明其五臟之
病、而用其五味之藥乎、如是者、不獨欺人、實爲自欺、
彼愚夫愚婦、受其欺者、本無足怪、至文人秀士、亦受
其欺、殊爲可笑、見人喜補者、遂謂虛衰、喜散者、遂云
外感、畏熱藥者、便用寒涼、畏涼藥者、便投溫熱、順病
人之情意、亂用醫方、竟不讀靈素以下諸書、全用欺

人之法、噫、醫之爲道、死生攸繫、一有欺心、卽藥餌妄投、存亡莫卜、奈何濟人之方、竟視作欺人之術也、吾願醫者、必須志在軒岐、心存仲景、究四診而治病、毫不自欺、方不愧爲醫者也、

○古今醫書宜參考論

昔賢云、觀今宜鑑古、無古不成今、今古醫書、均宜參考焉、考今古醫書、不能盡述、姑略提其要者言之、如神農本草、軒轅靈素、越人難經、長沙玉函、以及劉李

張朱四大家之書皆可備讀也。蓋讀本草者可知其性有寒熱溫涼平之不同。其味有酸苦甘辛鹹之各異。何爲補正。何爲祛邪。讀靈素者。可以上明天文。下達地理。兼知人身臟腑經絡受病之因。讀難經者。可補內經脈象病因。及奇經八脈之未逮。讀玉函者。可識傷寒雜病之源頭。此皆古聖之醫書。必須玩索。至於四大家者。卽河間劉守真。法多苦寒。溫病熱病者。須參考之。東垣李明之。法多升補。內傷脾胃者。須

時病論

卷之八

古今圖書集成醫部全錄

卷之八

參考之、大積大聚者、須參戴人張子和攻下之法、陰虛內損者、須考丹溪朱彥修清補之法、不特此四家以補先聖之未備、可參可考、而後賢所發之論、偶亦有超出於四大家者、如雲間李念莪、西昌喻嘉言、延陵吳又可、金壇王宇泰、會稽張介賓、長洲張路玉、吳郡薛立齋、慈谿柯韻伯、樵李沈目南、錢江張隱菴是也、以上諸公、各有著作、皆當採取、亦可以備參閱、考近時之醫書、亦不能盡述、如閱古吳葉香巖之臨證

指南可知臨時之圖、藥用藥之靈機、閱若耶章虛谷
之醫門棒喝、可知名家之疵謬、醒醫家之聾瞶、閱淮
陰吳鞠通之溫病條辨、可知寒傷於足、經溫傷於手
經、閱吳門周禹載之溫熱暑疫全書、可知溫熱暑疫
受病之源各別、此皆時賢之書、亦宜備考、至於長樂
陳修園、新安程觀泉、鹽官王孟英、武進費伯雄、皆有
著述所傳、偶或有導窾之處、亦宜參閱、竊思書有古
今、而人亦有古今、古人氣體俱厚、今人氣體漸薄、若

執古方以治今人之病、不亦重乎、故醫家不可執古書而不讀今書、亦不可執今書而不讀古書、參考古今、則醫理自得中和之道矣、

豐儀

最可人識時懷
妙術鎮日醉羣書
深造軒岐室

少逸先生尊照

月軒姚鑑摹并題



題詞

劉玉光

號潤臣安
陸人歲貢

雅度彬彬共喜親。機參活潑見天真。書精著述能傳世。學有淵源在濟人。聖手爭誇三折術。婆心常攄一腔春。畫工妙著如神筆。寫出鬚眉邁等倫。

劉耀光

號朗臣安
陸人監生

獨擅岐黃術。如君妙絕倫。存心惟濟世。著手即成春。品逸原超俗。天和自率真。是誰工寫照。瀟灑倍傳神。

劉明翰

號同甫安陸人湖南同知

古以良相譽良醫。濟人功德有同施。痼癘念能造
命。回春妙手推神奇。錚錚雷君久著名。我欣覲面心
爲傾。聞君幼習岐黃業。枕葑百家書縱橫。矧復淵源
續家學。趨庭訣受益求精。杏林種福數十年。診無不
治。爭相延。活命引。大造圓。診戾能消危。轉痊功深歷
練多著述。時病論中法周密。傾談之下示此編。抉盡
精微。據要術。八句提綱宗經旨。滙覽羣編擇尤美。臨

證立案附心裁。術業於此真神矣。書中間答論確然。蘊發前人所未宣。四時六氣證不一。表裏寒熱審宜先。洞悉標本並中見。脈絡分明條晰辨。伏氣新感病各殊。疑似不淆通常變。語本淺顯理實深。惟憑苦口表婆心。自抒所得勸同志。欲將妙道公醫林。卷餘畱像如有神。超然雅度工寫真。我知是書一出羣欽佩。讀其書者慕其人。

童名翼

號飛雲平
江人附生

生面憑誰特與開。一時霽月共低徊。家傳炮製精詳法。人擅經綸著作才。君嫻絲竹工書畫。著時病論一書言近指遠。一時推服無閒詞。偶入杏林資嘯傲。早占槐火善滋培。難經注疏靈樞秘。時病輪公領略來。

滿地紅羊劫急時。曾煩同澤起瘡痍。粵逆之亂。三衛襄辦其救時。自合通才倚。砭世兼能痼疾醫。肘後奇事甚力。方儕輩少耳鳴陰德子孫知。治病不計謝金。於貧者尤格外調護。更上淩煙閣。團扇家家畫最宜。

時病論

卷之八

郭惟寅

號協侯安陸人順天舉人

衢州有以醫名者曰雷少逸。其爲詣也。直窺乎靈樞之奧。而駸駸乎入長沙之室。余嘗誦時病論一書。竊歎其功之至專且壹。夫時之爲義大矣。先聖王敬以授民。維平維秩。所以協五紀。同六律。莫非養世以太和。致民於無疾。至於寒暑偶愆。陰陽或窒。則又深賴乎調劑得宜。轉移法密。范文正公有言曰。不爲良相。卽爲良醫。誠以相濟時。醫救時。勢位雖不同。而功用

未嘗不一。若雷君者。其未得變理之權。爰藉醫以行其濟世之仁術。是書一出。吾知披讀者想望風神。因其書慕其人名譽。永傳之可必。至其因時論證立案用方。先生之自述已詳。又奚待吾之贅述。

孔昭暖

號寅谷西
安人優貢

陰陽愆伏。察先時。手訂芸編。理灼知。義衍岐黃。垂巨論。名齊和緩。作良醫。四維妙用。回生易。數語推源。立法奇。驅使微材。皆妙品。豈惟茶薺。詠於詩。

時病論

卷之八

俊傑由來善識時。琴囊酒榼樂誰知。人同姬旦稱多藝。經闡炎皇異俗醫。佐使必良消沴戾。琳琅成秘擅靈奇。我如柳氏瞻韓切。一浣薔薇一誦詩。八首之二

程德鍾

號金門。西安人。湯溪訓導。

先生醫學早名家。腹蘊羣書氣自華。無限方中施雨露。視病不計醫金求。診者皆叨沾溉。有時筆底走龍蛇。精於書法。筆墨飛舞得古人驚蛇龍。科名悉淡胸何濶。嘗以濟世爲心。三知躍之致。好屢勸讀書應試公。悉卻詩興常濃手欲叉。生平喜賦詩。曾效八叉手而八韻成故事。壽世青囊

功效著千秋珍重定龍紗。

時病論功效素著見者無不寶貴當以碧紗籠之。

四首之一

程大廉

號讓泉西安人乙亥舉人

良相切痼瘕。濟世宏抱負。救人有良醫。名亦播眾口。

璞玉與渾金。厥相稱仁壽。憶昔兵燹時。落落欣聚首。

咸豐辛酉髮逆擾浙。君避

同善局。敞開力襄資吾友。

難來衢。廉與君始相識。

廉先君子與辦同善局。

羨君品藻清。好古探淵藪。緣

君力襄其事無少懈。

情見綺麗。敏捷籌父手。醉墨勢神霄。形模祖科斗。妙

繪繼顛倪。成竹胸中有一曲撫瑤琴。薰風入虛牖。君好

讀書工吟咏。字畫兼精。尤善於絲竹。澡身塵不侵。活人德彌厚。婆心攄

太和。療疾候調九。杏林樹茂榮。橘井水清瀏。立論達

陰陽。良方擬肘後。持此惠醫林。書傳名不朽。君所著時病論

瞭如指掌。可為醫學正宗。

王慶耀

號筱愚歙縣人寄居西安壬午舉人

醫理精深不易求。玉函金匱費尋搜。誰知數卷活人術。早冠三衢濟世儔。卻疾夙能驅二豎。著書業欲紹

千秋長桑已逝。長沙遠。絕學還從枕秘畱。

雷公炮製久風行。家學淵源業更精。愧我青囊無秘本。羨君素問有專營。一編直挾黃岐奧。千古同標朱李名。壽世壽民登壽寓。何須方外慕長生。

徐

瀛

號曉蓬西
安人歲貢

家學淵源有自來。翹然尤抱出羣才。著書克闡前賢秘。至理名言一卷該。

製就瑤編付棗梨。非圖名與緩和齊。爲防中有歧途

誤。願把南鍼指後迷。

論議高超見地真。垂將萬世壽斯民。儒家賢聖僧家
佛。只盡中心一片仁。

讀罷全書繫所思。羨君調劑妙因時。相逢盡是鳶魚
趣。此樂還期共領之。

龔應榮

號又英西
安人廩生

從古名儒盡志仁。不爲良相且醫人。淵源有自承先
業。變化難窮識病因。百代遺文供棄取。一心妙用入

奇神軒岐靈素分明在。我欲從公一問津。
飛昇有術業難精。藥樹雖多病轉生。最愛長沙工救
世。誰知扁鵲善辭名。八風有賊機先至。六律還宮調
遞更。海內諸公懸藻鑑。斯編一出定心傾。

葉復華

號象先西
安人增生

先生功德冠醫林。繪出丰神信可欽。業紹箕裘遺訣
妙。門盈桃李託根深。精奇共羨回春手。愷惻常存救
世心。二十餘年多種福。羣生沾澤若甘霖。

羨君書畫久傳名。學得軒岐術倍精。道在活人當竹
拜。書能濟世共葵傾。兩間氣化參無誤。四序溫寒辨
更明。自此民皆登壽域。婆心一片杼丹誠。

任欽達

號尊三西
安人監生

先生書法縱橫。畫同與可齊名。閒來絲竹寄幽情。淡
簪纓。淵源醫學人皆敬。羨君精益求精。常將佛手
濟羣生。競相迎。

觀君立論高超。妙將經旨分條。風涼寒暑按時調。細

推敲。倚書禪坐。參醫道。胸中學問偏饒。脫巾露頂。

最逍遙。遠塵囂。

調寄杏園芳二
闕有序未錄

葉元祺

號吉臣龍
游人拔貢

伊何人哉。寂靜如斯。古編千卷。身外自隨。此其風神
宜在名山滄海間。胡爲乎孳孳。屹屹窮年而甘作書
癡。豈有所託而隱。抑仁慈愷惻。聊以寓乎爲醫。尼父
聖之時。山雉物之時。而先生積數十載學問。著書以
鳴世。時乎其時。且也書法敏妙。畫法離奇。旣豪於酒。

兼工於詩。此特緒餘耳。而不足見先生之才之學之。
詣之爲。碧桃滿樹。紅杏在枝。書中奧窔。孰得而窺。試
問先生。先生曰知。

余躍龍

號海雲龍
游人恩貢

數卷新書妙沁脾。不爲良相願良醫。臨池獨擅神奇
品。寫竹偏饒灑落姿。先生善畫尤工寫竹紅杏春風瞻氣宇。碧
藥秋水證心期。我今寄語傳眞手。添箇靈胎作友師。

朱組綬

號若癩江
山人歲貢

天有六氣與四時。不得其正。疾以滋。孰宜汗吐孰和
下。醫宗妙理難通之。三衢有醫號少逸。資質聰明無
與匹。琴書詩畫俱能工。所學更專岐黃術。憶昔遍地
警烽烟。一朝聚晤豈無緣。烏巾白鶴馬中驥。君家喬
梓皆稱賢。太翁醫學得秘授。寒熱虛實參之透。兩銖
慣配藥。君臣活命良方守其舊。由茲遠近咸知名。一
時聞者心爲傾。稱良不愧肱三折。能使二豎悚然驚。
少逸有志箕裘紹。幼時父書讀多少。爭誇手到便回

時症論

卷之八

春種福杏林功不小。癆瘵痼疾盡心攻。尤妙時病法
玲瓏。陰陽熟辨追虛扁。補瀉溫涼任變通。如此圓機
誠罕有。得之心者應之手。二三年少志於醫。都向君
家供奔走。君以醫學悉傳人。耳提面命亦諄諄。著書
數卷公同好。居心能體大造仁。我本少逸舊知己。一
見是書輒心喜。謂既自成一家言。精乎其理神乎技。
况復舉此授生徒。醫林效法惠澤敷。衣鉢相傳淵源
接。綿延支派徧寰區。君不見醫國醫人功居上。託業

於斯氣已壯。同此變理擅長才。濟時何必推良相。

姜廷榮

號煥瑣江山人附生

素仰醫林魁首。五運六氣深求。溫熱涼寒俄頃受逢。
君弗杞憂。靈蘭常考究。獨把要旨勤搜。著述將時
救和緩也堪傳。

更羨聰明天授。書畫吟咏兼優。到處憐貧陰德厚。鴻
名遐邇留。丹青真妙手。寫就骨相清遒。疑是烟霞
叟。抱道傲公侯。
調寄好時光二則

時病論

卷之八

是言

四

徐思謙

號六皆常山人乙酉舉人

霽月光風比古人。一團元氣太和春。行披坐檢書多

味。鳳舞龍蟠筆有神。先生嗜古不倦尤工於書畫仿吳生工變化。

詩同庾信擅清新。兼書法詩才兼擅其勝高山流水添佳致。曲奏

瑤琴樂最真。先生暇時揮弦自樂

淵源家學久精研。道溯桐君悟妙詮。紅杏成林欣種

福。青囊施藥頌延年。先生診病遇貧乏者憐之不計醫金技兼盧扁肱

三折。理闡陰陽意十全。他日名編呈

四庫靈樞玉版並流傳。

時病論一書言簡意賅。醫林翕然稱服。

張鳳來

號蘭士。開化人。廩生。

壽世真詮妙悟開。知君曾飲上池來。慈悲解厄功參佛。宗派尋源胄衍雷。竹素萬言新著作。杏紅千樹舊滋培。一編括盡靈樞秘。小試先生變理才。

奕奕丰神繪典型。載賡詩句更空靈。瀾翻名士生花筆。陶鑄神農本草經。高尚世間無俗侶。前因天上認醫星。倩君解脫維摩病。我欲頻來扣竹扃。

少逸自題

字松存又號
侶菊布衣

本來蠢蠢一愚夫也。倩丹青繪入圖。圖中不見黃金屋。又無伴讀顏如玉。人間百物盡空虛。身外惟留幾部書。書可益智宜百讀。能闢我心娛我目。適性怡情在箇中。呖唔不輟樂無窮。任人噉我書癡子。朝兮夕兮祇於此。讀書絕不望簪纓。因爲平生學未精。光陰荏苒將垂暮。一事無成恐自誤。惜分惜寸竟何求。繫念惘惘道是謀。謀道還須專且壹。

未得入門。那入室。沈思妙道出軒岐。一旦融通左
右宜。但道是淵。非是徑。二十年餘若夢醒。醒來問
道道如無。道在胸中不可摹。摹得庸庸一小影。偷
閒獨坐神清靜。常披野服着芒鞋。脫帽露頂開胸
懷。自知陋質非俊傑。心潛不憚生涯拙。頻將靈素
細相參。欲付生徒作指南。宗聖師賢附管見。枯腸
搜盡猶不倦。萃集名言訂一編。分新辨伏是真詮。
專推六氣調時病。畱與醫林作話柄。

跋

歷來醫家說時病者多而專論時病之書罕見雖有論及者不過論其溫熱而未論及瘧痢秋溼卽間或有之亦祇附列於雜病門中而未論及時病由冬而春春而夏夏而秋秋而冬循環遞嬗統四時之常變以條辨也今我

夫子以內經之訓爲綱諸家之說爲目發明春令諸溫夏天熱暑秋時瘧痢冬月冬溫且補霉溼論治之

各異伏氣咳嗽之兩歧選一方而方中之利害必參
立一法而法中之用意必釋皆發前人之未發補前
人之未備是書一出猶濟世之慈航渡津之寶筏也
曦從

夫子業醫有年提命之下幸得其旨每遇命垂懸縷
者援活頗多故書中亦時載入芻言今當是書告成
敬抒數語以誌淵源所自云

受業門人新安程曦錦雯謹識

誠
母子素來多病皆蒙

夫子立起沉痾至今有生之日是誠戴德之年自詣
賦稟本孱不禁勞苦每欲下帷奮志而精力不逮時
抱采薪故絃誦之暇兼讀醫書藉以自養然苦無前
導師於醫理仍如夜行一無所見幸我

夫子不棄菲材列之門下遂授自著醫書數種展閱
之餘有若燈張暗處使誠茅塞漸開是書參究有年
始得其中要旨雖前人亦有論時病者皆不能若此

之明顯也惟我

夫子宗經旨爲八大提綱集名論爲七十二條目按時
序分新伏立諸法備成方并附曩治醫案有源有本
無黨無偏洵可以補先賢之未備爲後學之指南者
矣誠所附之俚言悉蒙採取竊謂既得治身之法旋
得菽水之歡此皆出吾

夫子之所賜也

受業門人盈川江誠抱一敬跋